

# Papru

## TIMIUTÉUN

### EMKA papin aar akuptukma

---

**1** <sup>1</sup>Wi Papru Jesukrístu akatramurintjai. In uwemtikkiartin Yussha tura ii Uuntri Jesukrístusha winia akuptuku áiniawai. Jesukrístujai métek ti shiir ajastai tusar nákaji. <sup>2</sup>Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukrístusha ti anenma ásar waitnentrainiak imiatkinchanum ti shiir pujustinian yainmakarti.

#### Wait chichamjai anearta

<sup>3</sup>Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuji wait-chichaman jintin ainia nu suritkiarta.

<sup>4</sup>Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

<sup>5</sup>Yus-shuar tuke enentáijjai Yúsan shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisan péñker ajasat tusar Yus-Chicham étsereaji. <sup>6</sup>Chíkich shuar juna iniaisar ántar chichaman áujmatainiawai. <sup>7</sup>Yúsnan nékachiat “jintinniuítjai” tuiniawai. Tura unuiniainia nuna nékainiatsui.

<sup>8</sup>Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. <sup>9</sup>Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsnancha nakitiainia nunasha, aparín máinniasha, nukurín

máinniasha, kame maṅkartinniasha, <sup>10</sup>nuwancha tura áishmaṅnasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péṅkercha nuna iwiaratniun akupenawai. <sup>11</sup>Núnisaṅ tawai ti shiir uwempratin chicham Yus suramsamajnia nu. Nu chichamnaka etserkatniun Yus péṅker asa tsanṅkatrukuiti.

### Yus waitnenkartin asamtai Papru yumĩṅsamiayi

<sup>12</sup>Ii Uuntriṅ Jesukrístu shiir enentáimtururu asa Níiniun etserturkat tusa kakarman surusuiti. Túruta asamtai yúmĩṅkiajai. <sup>13</sup>Wi Yúsan imiá yajauch chicharniuyajai. Yus-shuarnasha áinṅrarmiajai. Yusnasha katsekniuyajai. Túrin aĩṅ Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayajai. <sup>14</sup>Tura ii Uuntriṅ Jesukrístu ti nekas waitnentrurmiayi. Tura Jesukrístujai tsaniṅkia pujakui Yus nekas enentáimtustinniasha tura aneṅkartin ajastinniasha surusuiti.

<sup>15</sup>Ju chicham ti nekasaiti. Tunáa shuáran uwemtikrataj tusa Jesukrístu ju nunṅkanam taramiayi. Nunasha ashí shuar nekaatin áiniawai. Tura wikia ashí shuarjai naṅkaamas tunáan túriniaitjai. <sup>16</sup>Ti tunáa aĩṅ Jesukrístu ti aneṅkartin ana nu paant nekanati tusa Yus winia waitnentrurmiayi Tuma asamtai chíkich shuar, wijiajai métek, Yúsan nekas enentáimtusar Nijijai tuke iwiaaku pujusartatui. <sup>17</sup>Yus tuke jacha asa tuke iniaitsuk akupniuiti. Wáinchataitiat imiá naṅkaamas nékaiti. imia Niṅki Yúsaiti. Tuma asamtai imia Niṅki tuke iniaitsuk ti shiir awajsatniuiti. Núnisaṅ tuke atí.

<sup>18</sup>Uchiru, Timiutéu, yáunchuya Yus-shuar ámin “Ju shuar péṅkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata. <sup>19</sup>Chíkich shuar tunaajai anearcharu ásar Yúsan ikiukiarmai. <sup>20</sup>Iminúsha tura Arejántrusha núnisaṅ Yúsan ikiukiarmatai uunt iwianchnium surukarmajai. Nujai Yúsan ti yajauch chicharsacharat tusan túraitjai.

### Yus áujsatin

**2** <sup>1</sup>Wátsek, emka seajrume Yus áujeakum Yus yumĩṅsam ashí shuar yaiṅkiat tusam áujtusarta. <sup>2</sup>Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péṅker akupkarat tusar Yus áujtustiniaitji. <sup>3</sup>Áitkiasar seatin péṅker asamtai, uwemtikramajnia nú Yus wakerawai. <sup>4</sup>Ashí shuar nekas chichaman nekaawar uwemprarat tusar wakerawai Yus. <sup>5</sup>Aya chikichik Yus awai. Tura Jesukrístu aents ajas Yusjai áentsun nawamnamtikiartiniaiti.

<sup>6</sup>Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. <sup>7</sup>Nuna túratniun Yus winia akatar akuptukuiti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrutsuk nekas tajai.

<sup>8</sup>Nu asantai áishmañka kajetsuk yajauch tunaitsuk antsu péñker enentáijiaí uweje takuiniar Yúsan áujstari. <sup>9-10</sup>Núnisan núwaka iwiarmamuk nekasmiancha péñker enentáijiaí entsararti. Chíkich shuar nu nuwán iis temashmarmaríncha, sháukríncha, kurimkiamuncha, iwiarmampramuríncha núnaka enentáimtutsuk antsu ni péñker túrunamun enentáimtusarti. Núnisan áchatniukai nuwá Yús-shuar ainia nujai. Ni péñker túramujai nekas shiir awajmamsashtinkiait. <sup>11</sup>Núwaka takamtak pujusar umiiniak unuimiararti. <sup>12</sup>Nuwanka ashí iruntramunam ununiartinniasha tura ni áishrín akupkatniuncha suritijai. Antsu takamtak pujustiniaiti. <sup>13</sup>Yus emka áishmañkan Atañkan najanamiayi. Nuyá nuwán Épan najanamiayi. <sup>14</sup>Tura Yus timian umirkach Atañka anañnachmiayi. Antsu Épa anaña asa tunaan túramiayi. <sup>15</sup>Túmaitiat jurertin asa, emesnartinniumiã uwempraiti. Tura Yúsan nekas enentáimtak anenkartiniaitiuk tura esetar enentáimiuk péñker wekasatniuiti.

### Yus-shuaran wáinin

**3** <sup>1</sup>Shuar Yus-shuaran wáinkiatniun wakerakka péñker takatan achikiuiti. Nuka nekasaiti. <sup>2</sup>Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti. <sup>3</sup>Nampechusha tura suiir enentáimtichusha átiniaiti. Aya kuítian ikiaun̄katniun enentáimtuschatniuiti. Antsu tsañka átiniaiti. Kajechusha átiniaiti. Chikichnancha wakerutkashtiniaiti. <sup>4</sup>Ni shuarín shiir akupeakui ni uchirísha umin tura shiir awajkartin ártiniaiti. <sup>5</sup>Kame ni shuarín akupkachminiaitkiun̄ka ¿itiurak Yus-shuaran wáinkiat? <sup>6</sup>Yus-shuaran wáinniuka yama Yus-shuar ajasu áchatniuiti. Túmaitkiun̄ka ti nan̄kaamantu enentáimtumak iwianchjai métek tunaan túrak sumamattawai. <sup>7</sup>Yus-shuarchasha nin shiir enentáimtustin ániawai. Núnischaitkiuin̄kia nin yajauch chicharainiakui íwianch wárik tunaanum ajuartatui.

### Yus-shuaran yain

<sup>8</sup>Núnisan Yus-shuaran yaincha péñker asantai ashí shuar nin shiir enentáimtustin ániawai. Nii tana nuna tímatrusan̄ umin átiniaiti. Nampechu átiniaiti. Aya kuítian ikiaun̄katniun enentáimtuschatniuiti.

<sup>9</sup>Yúsnan ti penker nekaatniuiti. Tura esetar enentáimsatniuiti. <sup>10</sup>Emka penker fístiniaiti nuyá penker wekaakka Yus-shuaran yain átiniaiti. <sup>11</sup>Nuwasha penker asamtai ashí shuarsha nin shiir enentáimtustin áiniawai. Tsanumniuchu antsu esetar enentáimiar nii chichaa ímiatrusan umin átiniaiti. <sup>12</sup>Yus-shuaran yainkia nuwan apatkachu átiniaiti. Tura ni uchiríncha ni shuaríncha ashí shiir akupin átiniaiti. <sup>13</sup>Yus-shuaran yayak nekas penker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

### Yusna ana nu imiá nankaamas penkeraiti

<sup>14-15</sup>Wárik íitniun wakerajme. Túmaitiatak sétaknasha Yus-shuarjai takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. <sup>16</sup>Maa, imiá nekasaiti, Yus iwiainturmakma ashí nankaamas ti penkeraiti. Tura júiti:  
 Yuska aents ajas jú nunkanam paant wantinkiamiyai.  
 Yus Wakancha “ti shiiraiti” Nin tímiyai.  
 Yusa suntarisha Nin wáinkiarimiyai.  
 Ashí nunkanam nu etsernakmiyai.  
 Túramtai ashí nunkanmaya shuar umirkarmiiai.  
 Tura nayaimpiniam waketkimiyai.

### Amuukatin tsawantin

**4** <sup>1</sup>Yusa Wakani ti paant tawai, amuukatin tsawant jeakui untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. <sup>2</sup>Yajauch shuaran anturkartatui. Nu shuar ni enentái narúa áinin ásar ni tunáa túramun penké enentáimtichu áiniawai. Tuma asa shiir chichainiayatan wáitrin áiniawai. <sup>3</sup>Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yuminsar páchitsuk yuámin áiniawai. <sup>4</sup>Ashí Yus najanam penker asamtai nakittsuk antsu Yusan yuminsar yúatniuiti. <sup>5</sup>Yus-Chicham tana nújajisha tura yuiniak Yúsan yuminkias áujsamujai ashí penker ajasuiti.

### Jesukristu penker takarin

<sup>6</sup>Wi tájamna nu chíkich Yus-shuar jintintiakmeka Jesukristu penker takarin átatme. Tura ashí Yus-Chicham penker jintíamu unuimiaru asam nujai kakaram ajastatme. <sup>7</sup>Ántar chichamsha tura netse chichamsha enentáimtutsuk nekas Yusna ana nu túratin kakaram ajasta. <sup>8</sup>Kame ayash kakaram awajatsniusha ishichik penkeraiti. Antsu Yusna nu túratin kakaram ajastinkia imiá penkeraiti. Yamái ju nunkanmasha yáinmaji tura ukunmasha Yusjai pujustin asakrin nankaamas penkeraiti. <sup>9</sup>Nu imiá

nekas asamtai ashí shuar nuna enentáimtustiniaiti. <sup>10</sup>Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

<sup>11</sup>Nuka ashí ame jintíakum akupkatniuitme. <sup>12</sup>Ti úuntchaitkiumnisha nakitrampraraïn. Antsu péñker túrakum Yus-shuar unuiniarta. Chichammijiaisha, túramurmijiaisha, anenkratmarmijiaisha, nekas Yus enentáimtamujaisha, tura esetra enentáimsam Yusna péñker túramujaisha niisha túrawarat tusam iniaktusarta. <sup>13</sup>Wi jeatsaïn Yus-Chicham áujeakum shuar jintintiata. Túram Yus-shuar ikiakárarta. <sup>14</sup>Yus-shuara uuntri Yúsnan takastin anaitiamak uwejeñ awantramsarmai. Nuna túramainiak “Ju shuar kakarman Yúsnumiañ takustatui” túramarmia nu, kakaram ajasam tímiatrusam túratá.

<sup>15</sup>Tuke enentáimjai wi tájamna nu enentáimtakmin ame péñker túruki wéamun nekaawartatui. <sup>16</sup>Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

#### Yus-shuarjai itiuur túratniuit

**5** <sup>1</sup>Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajsarta. <sup>2</sup>Nuwa úuntchisha nekas ame núkua nútiksamek shiir awajsarta. Nuwa nátsasha nekas ame umaimia nútiksam shiir enentáimjai péñker awajsarta.

<sup>3</sup>Waje nekas atsumin ainia nusha yáinikiarta. <sup>4</sup>Tura waje uchirtiniaitkiuinkia tura tirankrinniuítkiuinkia, nu shuar wajen wáinkiarti. Emka ni shuarin péñker wáinkiatniun unuimiararti. Ni aparí anemia núnis awantuiniak shiir wáinkiarti. Núnaka Yus ti shiir enentáimtawai. <sup>5</sup>Nekas waje ninki pujana nu Yúsán enentáimtak tsawaisha káshisha iniaitsuk Yúsán áujeawai. <sup>6</sup>Antsu aya wárastiniak wakera nuka iwiaakiat jaka áintsankete. <sup>7</sup>Tura wajenka ni shuari wáinkiartí. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. <sup>8</sup>Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáintiniaiti. Túrachkuñka Yus tana nuna umiatsui, tura Yus-shuarcha nujai nankaamas yajauchiiti.

<sup>9</sup>Yusa kuírjiaï yáinniaiktiniaitkiuñka waje sesenta (60) uwí nankaamas takustiniaiti. Tura chikichik aishriniak takusu átiniaiti. <sup>10</sup>Ti paant péñker túrin átiniaiti. Ni uchirín péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiuñka maak.

<sup>11</sup>Tura sesenta (60) uwí takakchaka chíkich wajejai iruraip. Ni ayashi wakeramuri Krístuiya kanamtikiainiawai tura ataksha nuatnaikiatniun

wakeruiniawai. <sup>12</sup>Tura emka enentáimtiarmia nuna iniaisar sumamainiawai. <sup>13</sup>Nu arantcha nakimiainiak ántar irauwear chikicha itirchatrin áujmatsachminia nunasha áujmatin ániawai. <sup>14</sup>Nu asantai waje úchipiak ainia nuka uyurtukar uchin takusarti. Tura nuwa nuatkamu takastinia nuna túrawartí. Tura ni túrunamurijjai in kajertamainiaj nú shuar yajauch enentáimturmarcharti. <sup>15</sup>Kame nuik chíkich chíkich waje Krístuiya kanakiar iwianchin nemarsaru ásmatai nuna tájai.

<sup>16</sup>Áishmansha nuwasha Yus-shuar ainia nu ni shuariin waje ákuinkia Yusa kuítrin seatsuk nii yaintí. Nujai chíkich wajén nekas atsumainia nuna Yusa kuitri yáintatui.

<sup>17</sup>Yus-shuara uuntri Yus-shuaran péñker wáinkiarua nu, nekas shiir enentáimtustin ániawai. Tura akinkiamniasha ániawai. Nekaska Yus-Chichaman etserkatniuncha tura ununiartinniaasha tuke takaaka imiá shiir enentáimtustinaiti. <sup>18</sup>Yus-Papiniumsha núnisan áarmaiti:

Jiñkiaia saepen pakartaj tusa turu takaak nájakui ni nují  
jiñkiatáshtinaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

<sup>19</sup>Chikichik shuarak Yus-shuara uuntri tunaarin etsertukmatainkia anturkaip. Antsu jímiarsha menaintiusha tsanumtsuk métek tuiniakui anturkata. <sup>20</sup>Chíkich shuarsha ni tunaarin ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. <sup>21</sup>Yussha ii Uuntri Jesukrístusha tura nayaimpinmaya suntarsha ímiainiamunam “túrata” tájame. Ashí shuarjai niisháa enentáimtsutuk métekrak túrata. <sup>22</sup>Yus-shuara uuntri atí tusam wárik anaikiaip. Wárik túramka chikicha tunaarin sumamattame. Ashí tunaanum penké pachiiinkiaip.

<sup>23</sup>Wakemjai jau asam aya éntsak úmutsuk karía ishichik pachimpram umarta.

<sup>24</sup>Chíkich shuara tunaari wáitsatin imiá paant ániawai wáitsatin tsawant jeatsain. Tura chíkich shuara tunaarinkia paantcha ániawai antsu ukunam paant nekanawartatui. <sup>25</sup>Núnisan péñker túramusha ti paant ániawai. Tura yamá páantchaitiat tuke paantcha áchamniaiti. Páchitsuk nekanattawai.

**6** <sup>1</sup>Takarniutirmesha, atumí uuntri ti shiir umirkatarum. Túrachkuminkia chíkich shuar Yusnasha ii unuiniamuncha yajauch áujmattsartatui. <sup>2</sup>Atumí uuntri Yus-shuar ániakka aya Yusjai yatsum asantai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

### Yusna wakeruktincha tura kuit wakeruktincha

<sup>3</sup>Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunka <sup>4</sup>nu shuar nankaamantu enentáimtumayat

ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaikiar péñker enentáimtunaisuk <sup>5</sup>tuke kakannainiawai. Tura tu aujmatnaisatniun wakeruiniiana nú shuar nekas-chichaman nékachu ásar aya tunaan enentáimtin áiniawai. “Yusna ana nujaj kuítrintin ajasminiaiti” tuiniawai. Nu shuar pachisaip. <sup>6</sup>Shuar takakna nujain waraakka Yusna ana nujajsha waraak ju nunkanmasha tura nayaimpinmasha nekas kuítrinniuiti. <sup>7</sup>Iis, ju nunkanam misuk támaji; núnisar misuk jiinkittiaji. <sup>8</sup>Tuma asantai yurumkasha tura entsataisha takakkurkia nujain warasa pujustiniatiji. <sup>9</sup>Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiurchatan wáiniainiawai. Nujaj emesratniunmasha jeainiawai. <sup>10</sup>Kame kuit aneatniuka ashí tunáanum úsutmakminiaitiji. Chíkich shuar nuna wakerukar Yus enentáimtustinian iniaisar ti itiurchatjaj yajauch awajmamsarai.

### Yusna nu túrunat tusam kakaram ajástá

<sup>11</sup>Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsunrata. <sup>12</sup>Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme. <sup>13</sup>Yuska ashí iwiaaku átinian súwiti. Jesukrístusha Punsu Piratuí nekasa nuna ti paant ujakmiayi. Tuma asantai Yussha Jesukrístusha írainiamunam nuna tájame. <sup>14</sup>Ii Uuntri Jesukrístu táatsain wi tájamna nu yapajítsuk tura yajauch chicharnakchamnia péñker umiktá, tájame. <sup>15</sup>Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjaj nankaamas Úuntaiti. <sup>16</sup>Iwiaaku átinia nérenniuri Nínkiti. Ti tsáapninnium pujakui nuntumtuachminiaiti. Wáinchatai asantai shuar péñké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisan atí.

<sup>17</sup>Jú nunkanam kuítrintin ainia nusha nankaamantu enentáimtumasharti. Kuitcha yúpichuch menkakamnia asantai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. <sup>18</sup>“Péñker túratarum” tiarta. Tákumin niisha shiir enentáijjai ni takakman ajamsarti. Nuyá nú péñker túramujaj Yusaj ikiáunkartí. <sup>19</sup>Nuna túruiniak kuítriniawartatui. Núnisan tuke iwiaaku átinian wáinkiaratui.

### Amuak Timiutéun akatramu

<sup>20</sup>Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. <sup>21</sup>Chíkich shuar nuna umirkar Yusaiya kanakiarai.

Wátsek, Timiutéu, Yus shiir yainmakti.

Nuke atí.